

ՀԱՅՈՑ ՑԵՂԱՍՊԱՆՈՒԹՅԱՆ ՈԳԵԿՈՉՈՒՄԸ ՀՆԴԿԱՀԱՅ ԳԱՂՈՒԹՈՒՄ

Ապրիլի 24-ին, Մեծ Եղեռնի 91-ամյակի կապակցությամբ, Կալկաթայի Ս. Նազարեթ հայկական եկեղեցու բակում տեղադրված Հայոց ցեղասպանության 50-ամյակին նվիրված հուշաքարի մոտ, գլխավորությամբ հնդկահայոց հոգևոր հովիվ և Մարդասիրական ճեմարանի կառավարիչ Տ. Օշական վրդ. Գյուլգյուլյանի, կատարվեց հոգեհանգիստ բյուրավոր նահատակների հոգիների խաղաղության համար: Արարողության ավարտին Հայր Սուրբը խոսքով դիմեց ներկաներին՝ ընդգծելով, որ երբեք չպետք է մոռացության մատնենք մեր բյուրավոր նահատակների հիշատակը և մեր գործերով ու անդուլ աշխատանքով զորացնենք մեր անկախ Հայրենիքն ու Առաքելահիմն Սուրբ Եկեղեցին, որպեսզի այլևս չկրկնվեն նմանատիպ ոճրագործությունները:

Հոգեհանգստին մասնակցում էին Հնդկաստանում ՀՀ արտակարգ և լիազոր դեսպան Աշոտ Քոչարյանը, Կալկաթայի եկեղեցական խորհրդի անդամները, հնդկահայեր և Մարդասիրական ճեմարանի սաները: Հավարտ հոգեհանգստի ներկաներն այցելեցին և ծաղկեպսակներ դրեցին Առաջին համաշխարհային պատերազմում զոհվածների հուշարձանին, որից հետո հնդկահայոց հոգևոր հովիվը և եկեղեցական խորհրդի մի քանի անդամներ օրվա առիթով այցելեցին «Future hope» բարեգործական կազմակերպություն, որ խնամում է շուրջ 120 թափառաշրջիկ երեխաների: Օշական վարդապետը Հայոց Եկեղեցու անունից հանձնեց բանկային մի չեկ, որի գումարով կհոգացվեն երեխաների մեկ շաբաթվա սննդի բոլոր ծախսերը:

Երեկոյան Հայոց Մարդասիրական ճեմարանի շենքում տեղի ունեցավ ոգեկոչման երեկո՝ նվիրված Հայոց ցեղասպանությանը, որից առաջ Տ. Օշական վրդ. Գյուլգյուլյանը, Հնդկաստանում մեր դեսպանը և Կալկաթայի եկեղեցական վարչության ատենապետ Հայկ Սուքիասը ճեմարանի տարածքում տնկեցին մշտադալար մի եղևնի՝ ի հիշատակ մեր նահատակների: Միջոցառման սկզբում բարիգալստյան խոսք ասաց ճեմարանի ադմինիստրատոր Տիգրան սրկ. Բաղումյանը: Այնուհետև Հնդկաստանում ՀՀ արտակարգ և լիազոր դեսպան Աշոտ Քոչարյանն ընթերցեց ՀՀ նախագահ Ռոբերտ Քոչարյանի ուղերձը Ցեղասպանության զոհերի հիշատակի օրվա կապակցությամբ: Նա նաև հանդես եկավ բանախոսությամբ՝ համառոտ անդրադառնալով Հայոց ցեղասպանության պատմությանը և միջազգային ճանաչման գործընթացին: Երեկոյի ընթացքում ներկաները դիտեցին Հայոց Մեծ եղեռնին նվիրված վավերագրական տեսաֆիլմ:

Ոգեկոչման երեկոյին մասնակցում էին Կիպրոսի և Սլովակիայի պատվո հյուպատոսները, ՌԴ պատվո հյուպատոսարանի խորհրդականը և մշակութային կենտրոնի տնօրենը, հնդկահայեր և Մարդասիրական ճեմարանի սաները:

ԴԻՎԱՆ ԿԱԼԿԱԹԱՅԻ ՀԱՅ ՀԱՄԱՅՆՔԻ